



Mo Aforikaborwa Letsatsi la 16 Sedimonthole ke
letsatsi la boikhutso la botlhe.

Buka e e bua ka Letsatsi la Poelano.

O tlide go utlwa ka hisitori ya lona, le gore goreng le
le botlhokwa.



Rremogolo o lebeletse Letsatsi la Poelano mo thelebišeneng kwa lapeng.

"Rremogolo, *Umkhonto we Sizwe* (MK) ke eng?" Gone poelano ke eng?" ga botsa Puseletso.

"O botsa dipotso di le dintsi ka nako e le nngwe. Reetsa, ke go rute!" ga bua rremogolo.



MKe ne e le batlhabani ba ANC. Ba ne ba Iwantsha puso ya tlhaolele. Tlhaolele e ne e kgetholola batho Bantsho,"ga tlhalosa rremogolo.

Gompieno batho ba itumetse ka gonne ke letsatsi la tshwarelano le poelano," a bua.



"A o gakologelwa fa o ne o sa buisane le Dikeledi beke
yotlhe?" Ga botsa rremogolo.

Puseletso a koma ka tlhogo.

"Ka bonya lo ne lwa nna ditsala gape?"

Puseletso a koma gape ka tlhogo.

"Seo ke sona maitshwarelano le poelano,"ga nyenya
rremogolo.



"Letsatsi la 16 Sedimonthole ke letsatsi la maitshwarelano le poelano," rremogolo a tswelela pele.

"Letsatsi le, le na le hisetori e telele. Kgang e simolola ka ntwa e e neng ya diragala bogologolo ka la 16 Sedimonthole 1838."



"Ka letsatsi leo mo hisetoring, batlhabani ba ga Kgosi Dingane wa MaZulu le MaVoortrekkere ba ne ba lwa ntwa e kgolo gaufi le noka ya Ncome."

"Go ne ga fenza mang?" ga botsa Puseletso.



Rremogolo a araba, "MaVoortrekker ba ne ba fenza.

Ke nako e telele ba keteka phenyo e ka la 16 Sedimonthole.
Ba le bitsa Letsatsi la Maikano.



Jaanong, ka 1962 ka la 16 Sedimonthole, *Umkhonto we Sizwe* o ne wa tlhamiwa.

E ne e le masole a ANC a a neng e ikemiseditse go Iwantsha puso ya tlhaolele.



"Rremogolo, tota ke eng se se neng sa tlhotlheletsa
Umkhonto we Sizwe go lwa morago ga dingwaga tse dintsi
tsa tlhaolele?" ga botsa Puseletso.

"Go ne go na le mabaka a mmalwanyana. Se se diragetseng
kwa mogwantong wa didompas, e ne e le lebaka le le golo,"
ga bua rremogolo.

"Dompas ke eng?" ga botsa Puseletso.



Rremogolo a araba, "Dompas ke pasa ya bogologolo. Batho Bantsho botlhe ba ne ba pateletswa go rwala pasa e.

"Ka 1960, ka mogwanto wa kagiso wa go gana go rwala dipasa, mapodisa a ne a tlhasela bagwanti. Mapodisa a tlhaolele a ne a bolaya le go gobatsa batho, kwa Sharpeville mo Gauteng."



"Dikgotlhang tsa bogologolo di ne di kgaogantse batho Basweu le batho Bantsho," rremogolo a busa mowa.

"Botsala bo ka agiwa fela mo godimo ga nnete. Go tshwanetse go itsewe gore go ne go diragetse eng magareng ga batho Basweu le batho Bantsho ka ntlha ya tlhaolele," a bua.



"A mme go bonolo go itshwarelana morago ga dintwa tse di kana?" ga botsa Puseletso.

"Nnyaa! Ga go bonolo. Fela, gore re tswelele pele, tshwarelano le poelano di botlhokwa magareng ga batho," rremogolo a araba.

"Poelano ga e tle ka bonako. Poelano e tsaya nako e telele," a tlaleletsa.



"Fa mongwe a dirile phoso, o tshwanetse a bua nnete, mme a kopa maitshwarelo mo mothong yo o mo diretseng phoso. Morago ga moo, ba ka simolola go siamisa botsalano ba bona," ga tlhalosa rremogolo.

"O ne o reeditse sentle. A re bogele se o ratang go se bogela mo thelebišeneng!"ga nyenya rremogolo.



—Dipotso

1. Letsatsi la Poelano le ketekwa leng? Ke goreng e le letsatsi la botlhe la boikhutso?
2. *Umkhonto we Sizwe* ke bomang?
3. MaVoortrekkere ke bomang?
4. Tlhaolele e ne e le eng?
5. Tlhalosa ka mafoko a gago gore 'poelano' e kaya eng.
6. Batho ba ka fitlhelela poelano jang?
7. A o nagana gore poelano e botlhokwa?
8. Akanya ka mongwe mo balelapeng la gago kgotsa kwa sekolong yo o tlhokang go boelana le ene. Kwala gore o ka dira seno jang.



—Dibuka tse di mo motseletseleng o

- Letsatsi la Poelano
- Letsatsi la Kgoolesego
- Letsatsi la Ngwaoboswa
- Letsatsi la Ditshwanelo tsa Botho
- Letsatsi la Basadi
- Letsatsi la Badiri
- Letsatsi la Bašwa



Bukakgang e, e tlhamilwe le go kwalwa ka
Setswana, e le karolo ya porojeke ya Zenex Ulwazi
Lwethu ya 2020 ya dibuka tsa go buisa.